

**Jismoniy va yuridik shaxslar hamda O‘zbekiston Respublikasi Vazirlar
Mahkamasi huzurida Kosmik tadqiqotlar va texnologiyalar agentligi
o‘rtasidagi nizolarni sudgacha hal qilish bo‘yicha apellatsiya kengashi
to‘g‘risida
NIZOM**

1-bob. Umumiy qoidalar

1. Ushbu Nizom Jismoniy va yuridik shaxslar hamda O‘zbekiston Respublikasi Vazirlar Mahkamasi huzurida Kosmik tadqiqotlar va texnologiyalar agentligi (keyingi o‘rinlarda — “O‘zbekkosmos” agentligi) o‘rtasidagi nizolarni sudgacha hal qilish bo‘yicha apellatsiya kengashining (keyingi o‘rinlarda — Apellatsiya kengashi) maqomi, asosiy vazifalari, huquq va majburiyatlari, shuningdek, faoliyatini tashkil etish tartibini belgilaydi.

2. Apellatsiya kengashi “O‘zbekkosmos” agentligi huzurida nizolarni sudgacha hal qilish maqsadida tuziladigan kollegial-maslahat organi hisoblanadi.

Apellatsiya kengashi a‘zolari o‘z faoliyatini jamoatchilik asosida amalga oshiradi.

3. Apellatsiya kengashi o‘z faoliyatini O‘zbekiston Respublikasining xalqaro shartnomalari, O‘zbekiston Respublikasi Konstitutsiyasi va qonunlariga, O‘zbekiston Respublikasi Oliy Majlisi palatalarining qarorlariga, O‘zbekiston Respublikasi Prezidentining farmonlari, qarorlari va farmoyishlariga, Vazirlar Mahkamasining qarorlari va farmoyishlariga, shuningdek, ushbu Nizomga va boshqa qonun hujjatlariga muvofiq amalga oshiradi.

4. Apellatsiya kengashi davlat organlari, boshqa tashkilotlar, mansabdor shaxslar va fuqarolardan mustaqil ravishda jismoniy va yuridik shaxslarning murojaatlarini ko‘rib chiqadi va ular bo‘yicha xulosalar tuzadi.

2-bob. Apellatsiya kengashining asosiy vazifalari

5. Quyidagilar Apellatsiya kengashining asosiy vazifalari hisoblanadi:
jismoniy va yuridik shaxslar hamda “O‘zbekkosmos” agentligi o‘rtasida yuzaga keladigan nizolarni sudgacha ko‘rib chiqish va xulosa qabul qilish orqali ularni hal qilish choralari ko‘rish;

murojaatni ko‘rib chiqishda qonun hujjatida turlicha talqin etilishi mumkin bo‘lgan normalar aniqlangan, u amaliyotda noto‘g‘ri yoki ziddiyatli tarzda qo‘llanilgan taqdirda, ularni belgilangan tartibda rasmiy sharhlashni tashkillashtirish bo‘yicha choralarni ko‘rish;

murojaatni ko‘rib chiqishda aniqlangan qonun hujjatlaridagi bo‘shliqlarni bartaraf etish bo‘yicha takliflar kiritish.

6. Apellatsiya kengashi murojaatlarni ko‘rib chiqishda:
teng huquqlilik, xolislik, qonuniylik, kollegiallik va huquqni qo‘llash amaliyotining birxilligini ta‘minlash;

murojaat etuvchilarning huquqlari va qonuniy manfaatlariga rioya qilish;

jismoniy va yuridik shaxslarning murojaatlari to'g'risidagi qonun hujjatlarida bartaraf etib bo'lmaydigan barcha qarama-qarshiliklar va noaniqliklarni murojaat etuvchining foydasiga talqin qilish prinsiplariga asoslanadi.

3-bob. Apellatsiya kengashining huquq va majburiyatlari

7. Apellatsiya kengashi murojaatni ko'rib chiqishda quyidagi huquqlarga ega:

murojaat etuvchilar, shuningdek, boshqa manfaatdor shaxslardan murojaatni ko'rib chiqish uchun zarur bo'lgan qo'shimcha materiallar va ma'lumotlarni so'rab olish;

Apellatsiya kengashi vakolatlariga taalluqli masalalar bo'yicha ma'lumotnomalar, axborot-tahliliy materiallarni belgilangan tartibda so'rash va olish;

qo'shimcha ekspertiza tayinlash, uni o'tkazish uchun mustaqil ekspert va maslahatchilarni jalb etish;

murakkab masalalarni o'z ichiga olgan murojaatlarni ko'rib chiqish uchun Apellatsiya kengashi a'zolaridan ishchi va ekspert guruhlarini tashkil etish;

zarurat bo'lganda, murojaatlarni ko'rib chiqishda qatnashish uchun davlat organlari, ilmiy va ta'lim muassasalari, nodavlat notijorat tashkilotlaridan mutaxassislar va ekspertlarni taklif qilish.

Apellatsiya kengashi qonun hujjatlariga muvofiq boshqa huquqlarga ham ega bo'lishi mumkin.

8. Apellatsiya kengashi murojaatni ko'rib chiqish jarayonida quyidagilarga majbur:

qonun hujjatlariga va mazkur Nizom talablariga qat'iy rioya qilish;

fuqarolarning sha'ni va qadr-qimmatini kamsitishga, ularning shaxsiy hayotiga aralashuvga yo'l qo'ymasligi;

murojaatni ko'rib chiqish yuzasidan qabul qilingan xulosalar haqqoniyligini va asoslanganligini ta'minlashi;

“O'zbekkosmos” agentligi faoliyati bilan bog'liq qonun hujjatlarida belgilangan cheklovlarga amal qilishi;

“O'zbekkosmos” agentligi va uning mansabdor shaxslarining o'z vakolatlari doirasida amalga oshiradigan faoliyatiga aralashmasligi;

“O'zbekkosmos” agentligi va uning mansabdor shaxslari faoliyat ko'rsatishi uchun to'sqinlik qilmasligi;

murojaatni ko'rib chiqish davomida olingan axborotning, agar bunday axborotni tarqatish qonun bilan cheklangan bo'lsa, sir saqlanishiga rioya qilishi.

Apellatsiya kengashiga murojaatni ko'rib chiqish jarayonida qonun hujjatlariga muvofiq boshqa majburiyatlar ham yuklanishi mumkin.

4-bob. Apellatsiya kengashi faoliyatini tashkil etish tartibi

9. Apellatsiya kengashining tarkibi tegishli “O'zbekkosmos” agentligi rahbarining buyrug'i bilan ikki yarim yil muddatga tasdiqlanadi.

Apellatsiya kengashi 7 nafar a'zoldan iborat tarkibda tuzilishi mumkin.

Apellatsiya kengashining tarkibiga uning raisi, rais o'rinbosari, kotibi va boshqa a'zolari kiradi.

Apellatsiya kengashi a'zoriga amaliy tajribaga va obro'-e'tiborga ega "O'zbekkosmos" agentligining markaziy apparati tarkibiy bo'linmalari rahbarlari va xodimlari, shuningdek sohada katta amaliy tajriba yoki ilmiy salohiyatga ega bo'lgan obro'li fuqarolar qabul qilinadi.

Bunda, "O'zbekkosmos" agentligining markaziy apparati tarkibiy bo'linmalari rahbarlari yoki xodimlari hisoblanmagan Apellatsiya kengashi a'zolari jami Kengash a'zolarining beshdan bir qismidan oshib ketmasligi lozim.

Apellatsiya kengashi raisi va o'rinbosari uning a'zolari tomonidan Apellatsiya kengashi a'zolari orasidan yashirin ovoz berish yo'li bilan saylanadi.

10. Quyidagi holatlarda Apellatsiya kengashining raisi, rais o'rinbosari, kotibi va a'zolari uning tarkibidan chiqarilishi mumkin:

ular tomonidan Apellatsiya kengashi tarkibidan chiqish to'g'risida ariza berilganda;

ular "O'zbekkosmos" agentligi bilan tuzilgan mehnat shartnomalari bekor qilinganda;

Apellatsiya kengashining majlislarida muntazam ravishda ishtirok etmaganda;

mazkur Nizomning 8-bandida nazarda tutilgan majburiyatlarni bajarmaganda;

ularga nisbatan chiqarilgan sudning ayblov hukmi qonuniy kuchga kirganda; sudning qonuniy kuchga kirgan hal qiluv qarori asosida ular muomalaga layoqatsiz, bedarak yo'qolgan yoki vafot etgan deb topilganda;

vafot etganda.

11. Quyidagi hollarda Apellatsiya kengashi a'zosi Kengash kun tartibiga kiritilgan masalalar yuzasidan majlisda ishtirok etishi mumkin emas va rad qilinishi lozim, agar u:

ishning natijasidan shaxsan, bevosita yoki bilvosita manfaatdor bo'lsa yoxud uning xolisligi va beg'arazligiga shubha tug'diradigan boshqa holatlar mavjud bo'lsa;

taraf yoki ishda ishtirok etuvchi boshqa shaxslarning qarindoshi bo'lsa.

12. Apellatsiya kengashining raisi:

Apellatsiya kengashi faoliyatiga rahbarlik qiladi va Kengash zimmasiga yuklatilgan vazifalarning bajarilishi uchun shaxsan javob beradi;

Apellatsiya kengashining majlislarini chaqiradi va unda raislik qiladi;

Apellatsiya kengashi vakolatiga taalluqli masalalarni uning ko'rib chiqishi uchun kiritadi;

davlat organlari, nodavlat notijorat tashkilotlari va xalqaro tashkilotlar bilan munosabatlarda Apellatsiya kengashi nomidan ish ko'radi;

Apellatsiya kengashi a'zolari o'rtasida vazifalarni taqsimlaydi;

Apellatsiya kengashi nomidan xulosalarni, majlislar bayonnomalarini va boshqa hujjatlarni imzolaydi;

Apellatsiya kengashi majlislari kun tartibini belgilaydi, Apellatsiya kengashi va taraflarni chaqiradi;

Apellatsiya kengashi tomonidan qabul qilingan xulosalarning ijrosini monitoring qiladi;

yuklangan vazifalarning bajarilishi bo'yicha Apellatsiya kengashi a'zolari ishini muvofiqlashtiradi;

"O'zbekkosmos" agentligining rasmiy veb-saytida va boshqa resurslarda joylashtiriladigan Apellatsiya kengashining faoliyati to'g'risidagi ma'lumotlar mazmuni bo'yicha takliflar kiritadi va uni "O'zbekkosmos" agentligi rahbari bilan kelishadi;

Apellatsiya kengashi tomonidan qabul qilingan xulosalar nizolarni hal qilishda inobatga olinishi yuzasidan "O'zbekkosmos" agentligining rahbari bilan hamkorlik qiladi;

Apellatsiya kengashi ishining samaradorligini oshirishga qaratilgan boshqa harakatlarni bajaradi.

13. Apellatsiya kengashining raisi bo'lmagan taqdirda, uning vazifalarini rais o'rinbosari bajaradi.

14. Apellatsiya kengashining kotibi:

murojaatlarni qabul qiladi va ro'yxatdan o'tkazadi;

Apellatsiya kengashining navbatdagi majlisiga barcha zarur materiallar o'z vaqtida tayyorlanishini ta'minlaydi, "O'zbekkosmos" agentligining xodimlaridan zarur hujjatlar va ma'lumotlarni so'rab oladi;

kun tartibiga muvofiq Apellatsiya kengashi majlislari o'tkazilishini tashkil etadi;

Apellatsiya kengashi majlisi o'tkaziladigan sana, joy va taklif etiladigan shaxslar ro'yxatini Apellatsiya kengashining raisi bilan kelishadi;

Apellatsiya kengashining a'zolarini va taklif etilgan shaxslarni Apellatsiya kengashi majlisi o'tkaziladigan joy, sana va vaqt haqida xabardor qiladi;

kun tartibidagi masalalarni ko'rib chiqish uchun zarur bo'lgan materiallarni Apellatsiya kengashi a'zolariga tarqatadi;

Apellatsiya kengashi xulosalarining "O'zbekkosmos" agentligi tomonidan inobatga olinishi yoki rad etilishi holati ustidan monitoring olib boradi hamda uning natijalarini Apellatsiya kengashi majlisida ko'rib chiqish bo'yicha takliflar kiritadi;

Apellatsiya kengashi majlisining xulosasini va bayonnomasini rasmiylashtiradi hamda xulosaning Apellatsiya kengashi a'zolari hamda boshqa manfaatdor shaxslarga jo'natilishini ta'minlaydi;

Apellatsiya kengashining faoliyatini uslubiy, tashkiliy-huquqiy va tashkiliy-texnik jihatdan ta'minlash masalalarini hal qiladi;

Apellatsiya kengashining samarali ishlashini ta'minlash bo'yicha boshqa vakolatlarni amalga oshiradi.

15. Apellatsiya kengashida jismoniy va yuridik shaxslarning "O'zbekkosmos" agentligi yoki mansabdor shaxslarning g'ayriqonuniy xatti-harakatlari (qarorlari) yoxud harakatsizligi natijasida o'z huquqlari va erkinliklari hamda qonun bilan qo'riqlanadigan manfaatlari buzilganligi haqidagi murojaatlari mazkur Nizomga ilovada keltirilgan sxemaga muvofiq ko'rib chiqiladi.

Jismoniy va yuridik shaxslar nizoli masalani Apellatsiya kengashida ko‘rib chiqish uchun ushbu Kengash tuzilgan “O‘zbekkosmos” agentligiga yozma (elektron) tarzda murojaat qiladi.

“O‘zbekkosmos” agentligining rahbari (yoki uning o‘rinbosarlari) tomonidan murojaat uning muallifini xabardor etgan holda u kelib tushgan kundan boshlab bir kun ichida ko‘rib chiqish uchun Apellatsiya kengashiga yuboradi.

“O‘zbekkosmos” agentligiga kelib tushgan takroriy murojaatlarda Apellatsiya kengashi vakolatiga kiradigan masalalar keltirilgan bo‘lsa, “O‘zbekkosmos” agentligi rahbari mazkur murojaatni ko‘rib chiqish uchun Apellatsiya kengashiga o‘z tashabbusiga ko‘ra ham jo‘natishi mumkin.

“O‘zbekkosmos” agentligiga kelib tushgan takroriy murojaat ko‘rib chiqish uchun Apellatsiya kengashiga jo‘natilgan hollarda, bu haqda murojaat etuvchiga darhol yozma yoki elektron xabar yuboriladi.

16. Murojaat Apellatsiya kengashiga kelib tushgan kundan e‘tiboran o‘n besh kun mobaynida, qo‘shimcha o‘rganish va (yoki) tekshirish, qo‘shimcha hujjatlarni so‘rab olish talab etilganda esa bir oygacha bo‘lgan muddatda ko‘rib chiqiladi.

Yuzaga kelgan nizoli holatni ko‘rib chiqish uchun tekshirish o‘tkazish, qo‘shimcha materiallarni so‘rab olish yoxud boshqa chora-tadbirlar ko‘rish zarur bo‘lgan hollarda, ularni ko‘rib chiqish muddatlari Apellatsiya kengashining raisi tomonidan, istisno tariqasida, ko‘pi bilan bir oyga uzaytirilishi mumkin, bu haqda murojaat etuvchiga darhol yozma yoki elektron xabar yuboriladi.

17. Apellatsiya kengashining a‘zolari o‘z majlislarida ko‘rib chiqiladigan masalalarni muhokama qilish va hal qilishda o‘z vakolatini boshqa shaxslarga o‘tkazish huquqiga ega emas.

Apellatsiya kengashining a‘zolari:

o‘z zimmlariga yuklatilgan vazifalarni bajarish uchun “O‘zbekkosmos” agentligi tomonidan tashkil etiladigan hay‘at majlislarida va boshqa ommaviy tadbirlarda ishtirok etadi;

Apellatsiya kengashi ish rejalarining loyihalarini tayyorlaydi, ularni Apellatsiya kengashida ko‘rib chiqish uchun kiritadi va tasdiqlangan ish rejalari bajarilishini ta‘minlaydi;

“O‘zbekkosmos” agentligi faoliyatining samaradorligini oshirish bo‘yicha takliflar va tavsiyalarni ishlab chiqishda hamda amalga oshirishda qatnashadi;

Apellatsiya kengashining kun tartibiga kiritilgan masalalar yuzasidan tahliliy materiallar tayyorlaydi;

Apellatsiya kengashining vakolatiga kiradigan masalalar bilan bog‘liq murojaatlarni ko‘rib chiqadi va natijalari bo‘yicha tegishli hujjatlarni tayyorlaydi;

Apellatsiya kengashining zimmasiga yuklangan vazifalarga muvofiq boshqa vakolatlarni ham amalga oshiradi.

18. Apellatsiya kengashi majlisi kun tartibining loyihasi kotib tomonidan Apellatsiya kengashi a‘zolarining takliflari va Apellatsiya kengashi raisining topshirig‘i asosida shakllantiriladi.

19. Apellatsiya kengashining majlisini uning raisi olib boradi. Rais ishtirok eta olmagan holatlarda, majlisni uning o‘rinbosari olib boradi.

Apellatsiya kengashining majlisida “O‘zbekkosmos” agentligi rahbari, uning o‘rinbosarlari va boshqa xodimlar ishtirok etishi mumkin.

Apellatsiya kengashining majlislariga boshqa davlat organlari, nodavlat notijorat tashkilotlari, fuqarolik jamiyati institutlarining vakillari hamda murojaat etuvchi yoki uning vakili taklif etilishi mumkin.

20. Apellatsiya kengashining majlisi, agar unda rais va/yoki uning o‘rinbosari ishtirok etganda va ushbu ishtirok bilan Apellatsiya kengashi a‘zolarining kamida uchdan ikki qismi (kvorum) ishtirok etgan taqdirda vakolatli hisoblanadi.

Majlisni o‘tkazish uchun kvorum shakllanmagan taqdirda, Apellatsiya kengashining yangi majlisi o‘tkaziladigan sana e‘lon qilinadi.

21. Apellatsiya kengashining xulosasi majlisda ishtirok etayotgan Apellatsiya kengashi a‘zolarining oddiy ko‘pchilik ovozi bilan qabul qilinadi. Ovozlar teng bo‘lgan hollarda Apellatsiya kengashi raisining yoki u yo‘q bo‘lganda uning o‘rinbosari ovozi hal qiluvchi ovoz hisoblanadi.

22. Apellatsiya kengashining majlisida qabul qilingan qaror xulosa shaklida rasmiylashtiriladi. Apellatsiya kengashi xulosasi majlisda ishtirok etgan barcha a‘zolar tomonidan imzolanadi.

Xulosaga qo‘shilmagan Apellatsiya kengashi a‘zosi xulosani imzolab, o‘zining alohida fikrini yozma shaklda taqdim qiladi. Alohida fikr ish materiallariga qo‘shib qo‘yiladi.

23. Apellatsiya kengashining majlis bayonnomasi kotib tomonidan imzolanadi va majlisga raislik qiluvchi tomonidan tasdiqlanadi.

24. Apellatsiya kengashining xulosasi uch kun muddatda “O‘zbekkosmos” agentligi rahbariga ko‘rib chiqish va boshqa manfaatdor taraflarga ma‘lumot uchun yuboriladi.

Apellatsiya kengashining xulosasi tavsiyaviy tusga ega bo‘lib, xulosani qabul qilib olgan “O‘zbekkosmos” agentligi rahbari yoki uning o‘rinbosari uni inobatga olishi yoki yozma asoslantirilgan tarzda rad etishi mumkin. Bunda, “O‘zbekkosmos” agentligi rahbari yoki uning o‘rinbosari qabul qilingan qaror to‘g‘risida uch kun muddatda Apellatsiya kengashi va taraflarni yozma yoki elektron tarzda xabardor qiladi.

5-bob. Yakunlovchi qoidalar

25. Apellatsiya kengashining faoliyatini moddiy-texnik jihatdan ta‘minlash u tashkil etilgan tegishli “O‘zbekkosmos” agentligining o‘z mablag‘lari, shuningdek, qonun hujjatlarida taqiqlanmagan boshqa manbalar hisobidan amalga oshiriladi.

26. Apellatsiya kengashining faoliyati mazkur Nizomga va boshqa qonun hujjatlariga muvofiq ekanligi u tashkil etilgan tegishli “O‘zbekkosmos” agentligining rahbari tomonidan nazorat qilinadi.

**Jismoniy va yuridik shaxslar hamda O‘zbekiston Respublikasi Vazirlar
Mahkamasi huzurida Kosmik tadqiqotlar va texnologiyalar agentligi
o‘rtasidagi nizolarni sudgacha hal qilish bo‘yicha apellatsiya kengashida
murojaatlarni ko‘rib chiqish
SXEMASI**

Bosqichlar	Mas’ullar	Tadbirlar	Muddat
1-bosqich	Jismoniy va yuridik shaxs (murojaat etuvchi)	Nizoli masalani Apellatsiya kengashida ko‘rib chiqish uchun ushbu Kengash tuzilgan “O‘zbekkosmos” agentligiga yozma (elektron) tarzda murojaat qiladi.	O‘z xohishiga ko‘ra
2-bosqich	“O‘zbekkosmos” agentligi	“O‘zbekkosmos” agentligining rahbari (yoki uning o‘rinbosarlari) tomonidan murojaat uning muallifini xabardor etgan holda Apellatsiya kengashiga ko‘rib chiqish uchun yuboriladi.	Murojaat kelib tushgan kundan boshlab 1 kun ichida
3-bosqich	Apellatsiya kengashi	<ol style="list-style-type: none"> 1. Kelib tushgan murojaatni har tomonlama va puxta o‘rganib chiqadi. 2. O‘rganish natijalarini o‘z majlislarida muhokama qiladi. 3. O‘rganish va muhokamalar natijasida tuzilgan xulosa majlisda ishtirok etayotgan Apellatsiya kengashi a’zolarining oddiy ko‘pchilik ovozi bilan qabul qilinadi. 	Murojaat kelib tushgan kundan boshlab 15 kun ichida (zaruratga qarab, 1 oygacha muddatda)
4-bosqich	Apellatsiya kengashi	Apellatsiya kengashi xulosasini “O‘zbekkosmos” agentligi rahbariga ko‘rib chiqish va boshqa manfaatdor tarablarga ma’lumot uchun yuboradi.	Xulosa qabul qilingan kundan boshlab 3 kun ichida

5-bosqich	“O‘zbekkosmos” agentligi	<p>1. Kelib tushgan Apellatsiya xulosasi va tegishli murojaatni ko‘rib chiqadi hamda murojaat bo‘yicha yakuniy qarorni qabul qiladi.</p> <p>2. Qabul qilingan qaror to‘g‘risida Apellatsiya kengashi va taraflarni yozma (elektron) tarzda xabardor qiladi.</p>	Xulosa kelib tushgan kundan boshlab 3 kun ichida
-----------	--------------------------	---	--